



Pinerluttup aallaavigineqarneranut taarsiullugu siunissami pinerluutigisap aallaavigineqartalernissaa pillugu Kalaallit Nunaanni pinerluttulerinermik inatsisip allanngortinneqarnissaa siunertaralugu Naalakkersuisut Naalagaaffeqatigiinni oqartussaasunut atassuteqarnissamut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Bo Martinsen, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataannut Bo Martinsen-imut siunnersuummut kusanartumut, Demokraatinit tapersikkatsinnut.

Maannakkut pinerluttup aallaavigineqartarnerata kinguneraa, inuit marluk, assigiimmik pinerluuteqarsimasut, assigiinngilluinnartunik eqqartuunneqartarnerat, tunuliaqutaat inuttullu atugaat kiserpiaasa aallaaviginerisigut.

Taassuma assigiinngisitsinerup inatsisinit illersorneqarnek sanngillisippaa, nalornilersitsilluni aammalu naapertuilluanngitsumik iliuuseqarnermik misigisimatitsilluni pinerlineqartumut aammalu taassuma qanigisaanut. Naapertuilluanngitsuliornerit sakkukitsunik kinguneqartinneqartillugit, innuttaasut aqqissuussaaneermut tatiginnikkunnaarnerannik kinguneqariaannaasarpoq.

Uagutsinnut Demokraatinut pingaarnerpaavoq, eqqartuussiviup pinerluutigisap pingaarnerutillugu aallaavigisallissammagu. Tassa iliuuserisap – pinerluttup tunuliaqutaa pinnani – inuiaqatigiit qisuariarnerannut aallaviusariaqarpoq. Demokraatini pinerlineqartoq illersortuaannarparput, isumaqarpugullu, pinerlineqartut taakkulu ilaqutai ersarissuliorfigineqarnissamik naapertuilluarnermillu iliuuseqarfigineqarnissaminnillu pisariaqartitsisut.

Pinerluutigisap aallaavigineqartalernerata pineqaatissiissutit ersarinnerulersillugillu malitseqarnerulersissavai. Inatsisinik malinninnissamut ileqqorissaarnissamullu ataqqinninnerulernermik pilersitsissaaq aammalu inuiaqatigiinni tunngaviusumik naapertuilluartumik pineqarnermut misigissuseqarnermut tapertaassalluni. Imaanngilaq, eqqartuunneqarsimasut ikiorsernissaat inuiaqatigiinnullu akuulerseqqinnissaannik ikiornissaat ilaginnassagipput, imaallunili, ikiorsiineq pinerluutip naapertuilluarneq ersarissumillu qisuariarnek tunulliutissagaa.

Siunnersuut nutarterinertut aamma isigaarput. Kalaallinut periuseq immikkut ittoq eqqunneqarpoq, suliffeqarfiutigut inerisimavallaanngikkallarmata. Ullumikkut inatsisitigut pginnaasalinnik peqarpugut sulisussaqraltalu, aqqissuussaaneerput timitaliinerunissamut aqutsisinnaanersitsisumik. Immikkut ittumik periuseqarnissamut pisariaqartitsijunnaarnikuuvugut, eqqartuussiveqarnermi naligiinnginnermik



pilersitsisuusumik.

Uuma siunnersuutip Inatsisartunut ilaasortamit Bo Martinsen-imit siunnersuutigineqartup akuerineratigut ersarissumik takutissavarput, naapertuilluarneq aallaaviussasoq, ersarilluni paasinartuullunilu. Innuttaasut tatigisariaqarpaat, pinerluutigisatik qisuariaateqarnermik kinguneqartassasut, aammalu pinerlineqarsimasut qitiutinneqartuassasut.

Maluginiarparput, Naalakkersuisut allannguutissatut siunnersuummik saqqummiussisut maanngangaarlu nalunaarutigerusullutigu, isumaqaratta, Inatsisartunut ilaasortap Bo Martinsen-ip siunnersuutaa pitsaanerusoq. Taamaattumik isumaqarpugut, ataatsimiititaliami suliarineqarnerani taanna ukkatarineqartariaqaartoq.

Taamatut oqaaseqaateqarlunga nalunaarutigissavara, Demokraatit siunnersuut una aammalu Naalakkersuisut allannguutissatut siunnersuutaat aappassaaneerneqannginnerani Inatsisit pillugit ataatsimiititaliami suliareqqinneqartussatut innersuussutigigaat.